



5. DWYSAN Y DDEILEN (Hydref)

Un tro roedd deilen o'r enw Dwysan. Cafodd ei henwi'n Dwysan oherwydd ei bod wastad mor ddwys a digalon – fel petai hi ar fin cwmpo oddi ar y goeden unrhyw funud. Roedd ei holl ffrindiau eisoes wedi syrthio. Cawsant eu hysgubo i ffwrdd gan y garddwr a'u llosgi mewn coelcerth enfawr. Dwysan oedd y ddeilen olaf un ar y goeden a theimlai'n unig iawn.

'O! mae gen i hiraeth am fy ffrindiau,' ochneidiodd. 'O na fyddai gen i rywun i sgwrsio â mi!'

Ceisiodd daro sgwrs â'r brigau. Ond doedd fawr o bwrpas.

'Bydd ddistaw, Ddeilen wirion,' oedd eu hymateb. 'Ryden ni wrthi'n gwneud cynlluniau at y gwanwyn nesaf. Rydyn ni'n rhy brysur i siarad hefo ti.'

Felly ceisiodd sgwrsio â'r canghennau. Ond doedd hynny fawr gwell 'chwaith.

'Paid â thorri ar ein traws, Dwysan,' meddent. 'Rydyn ni wrthi'n penderfynu faint o frigau allwn ni eu cynnal y flwyddyn nesaf.'

Rhoddodd gynnig ar siarad â'r hen foncyff hyd yn oed.

'Oes gen ti unrhyw syniad mor galed dwi'n gweithio i gael maeth o'r pridd?' cwynodd y boncyff. 'Y cwbl sydd arna i eisiau yn yr

hydref yw ychydig o heddwch a llonydd.'

Doedd gan neb amser i sgwrsio â Dwysan.

Rhaid oedd iddi hongian ar y goeden yn drist heb ddim i'w wneud a heb neb i sgwrsio â hwy.

Ac yna fe ddigwyddodd – clywodd sŵn anadl, a murmur isel:

'Pam na siaradi di hefo fi?' meddai llais.

Y gwynt ydoedd.

'Ond . . . ond . . . fedra i ddim siarad hefo *ti!* Crynai Dwysan. All deilen ddim sgwrsio â'r gwynt aruthrol.'

'Pam lai?' meddai'r gwynt.

'Oherwydd . . . wel . . . oherwydd nad ydw i'n ddigon clyfar. Fyddwn i ddim yn gwybod beth i'w ddweud.'

'Pwy ddywedodd nad wyt ti'n glyfar?' suodd y gwynt. 'Gwrandda arnaf fi, Dwysan. Ti'n gwybod mwy nag rwy'ti'n sylweddoli.' A gyda'r geiriau hyn ymadawodd y gwynt.

Er na pharhaodd y sgwrs ond ychydig eiliadau, teimlai Dwysan yn llawer hapusach.

A dweud y gwir roedd mor hapus nes iddi ddechrau mwman canu. 'Dwi'n gwybod mwy nag ro'n i'n feddwl, ffa-la-la. Dwi'n gwybod mwy nag ro'n i'n feddwl, ffa-la-la.'

'Bydd ddistaw, Ddeilen wirion!' gwaeddodd yr holl frigau a changhennau.

'Mae'n arw gen i, ffa-la-la. Does gen i ddim help, ffa-la-la. Dwi'n hapus!'

'Dyw hapusrwydd ddim yn esgus dros fod yn swnllyd,' meddai'r hen foncyff yn gysglyd. 'Yn enwedig pan nad oes gen ti ddim rheswm i fod yn hapus.'

'O, ond mae gen i reswm. Dwi newydd ddarganfod rhywbeth. Dwi'n gwybod mwy nag ro'n i wedi sylweddoli.'

'Dwyt ti'n gwybod dim,' cyfarthodd yr hen foncyff. 'Mae brigyn yn gwybod rhywbeth oherwydd fe wŷr sut i dyfu dail. Fedri di dyfu dail?'

'Na,' meddai Dwysan.

'Mae cangen yn gwybod rhywbeth oherwydd fe wŷr sut i gynnal brigau. Fedri di gynnal brigau?'

'Na,' meddai Dwysan.

'Mae boncyff yn gwybod rhywbeth oherwydd fe wŷr sut i sugno maeth o'r pridd. Fedri di wneud hynny?'

'Na,' meddai Dwysan.

'Wel dyna ni felly!' cyhoeddodd y boncyff. 'Ti'n gweld, Dwysan, rwyd ti'n dwp. Dwyd ti'n gwybod dim byd.'

'Clywch, clywch!' bloeddiodd y brigau a'r canghennau.

'Ond . . . ond fe ddywedodd y gwynt wrtha i . . .' baglodd Dwysan dros ei geiriau.

Pan glywodd enw'r gwynt yn cael ei grybwyll colodd yr hen foncyff ei dymer.

'Rhag cywilydd i ti! Pa hawl sydd gen ti i ddweud y fath beth! Mae'r gwynt yn rym nerthol a mawreddog a gaiff ei barchu a'i ofni gan goed dirifedi mewn gerddi ledled y wlad. Mae'n peri i'r ddaear grynu ac yn symud y nen. Nid yw'n siarad. Na. Rwyd ti nid yn unig yn anwybodus, Ddeilen, ond yn waeth na hynny, rwyd ti'n gelwyddog.'

'Hen Ddeilen gelwyddog ffôl!' llefai'r holl frigau a changhennau.

'Dwyd ti'n ddim mwy na hen swnen boenus. Pam na wnei di gwmpo oddi ar y goeden?'

Roedd pob defnyn o hapusrwydd wedi ei sugno o wythiennau Dwysan. Crebachodd ac aeth yn llipa trwyddi.

'O'r gorau,' meddai. 'Fe wna i.'

A gollyngodd ei gafael.

Daeth pwff o wynt. Cyn iddi gael amser i feddwl cafodd Dwysan ei chodi i fyny ac i fyny i'r awyr. Roedd fel bod yn y ffair. I ddechrau, cafodd dro ar yr olwyn fawr. Yna ar yr hyrddiwr. Ac yna'r chwyrligwgan.

'Wyd ti'n mwynhau hyn?' holodd y gwynt.

'Mae'n grêt!' llefodd Dwysan. 'Ond allwn ni stopio – dim ond am eiliad? Mae gen i rywbeth i'w ofyn . . .'

'Dos yn dy flaen. Dwi'n gwrando,' meddai'r gwynt wrth ostegu.

'Wel . . . ym . . . mae 'na rywbeth yn peri penbleth i mi. Dwi wastad wedi teimlo'n anwybodus. Wedi'r cyfan, dwi'n methu tyfu dail na chynnal brigau na sugno maeth o'r pridd. Felly yr hyn dwi angen ateb iddo yw – be yn union dwi yn wybod?'

'Tyrd yn dy flaen, Dwysan. Wyt ti heb ddyfalu eto?' gwenodd y

gwynt. 'Fe roddaf i gliw i ti. Nid yr hyn rwyf ti'n wybod . . . ond pwy rwyf ti'n adnabod . . . '

'Nid yr hyn dwi'n wybod . . . ond pwy dwi'n adnabod. Hei, aros funud . . . dwi'n eich adnabod CHI! Ac mae gwybod amdanoch chi'n ddigon.'

'Yn union.' A gyda rhuad aruthrol cipiodd y gwynt Dwysan yn uchel i'r awyr, a chwyrlïodd y ddau i ffwrdd gyda'i gilydd.

HYD: 4 munud. Gall y stori hon weithio'n dda fel meim. Bydd angen dau berson i chwarae rhannau'r gwynt a'r goeden. (Deilen bapur fawr yw Dwysan a chanddi wyneb hapus ar un ochr ac wyneb trist ar yr ochr arall.)

NEGES: Mae Duw am i ni ei adnabod nid yn unig fel ein Creawdwr ond fel ein Ffrind.

DARLLEN: Jeremeia 9: 23–24